



PORTAVÓS VI GOVERNUN KONSTITUSIONÁL



KOMUNIKADU BA MEDIA

Loron 3 fulan-juñu tinan 2015
Dili, Timor-Leste

Timor-Leste pretende hasai tiha keixa kona-ba kazu “Dokumentu sira” iha TIJ no loke fali kazu “Espionajen” iha TPA

Primeiru-Ministru Timor-Leste nian, Dr. Rui Maria de Araújo, ohin afirma katak Estadu iha intensaun atu taka prosesu kona-ba “Kestaun sira ne’ebé relasiona ho Apreensaun no Detensaun husi Dokumentu sira Balu no Dadus” [Timor-Leste vs. Austrália], ne’ebé apresenta ona ba Tribunál Internasionál Justisa nian (TIJ sigla iha lian portugés), iha Haia.

Desizaun ida ne’e mosu tanba fó fila hikas dokumentu hotu-hotu no dadus sira ne’ebé mak autoridade sira husi Austrália nian hadau, iha loron 12 fulan-maiu 2015.

Governu husi Austrália informa ba Tribunál Internasionál Justisa nian, iha fulan-abril tinan ida ne’e katak, nia hakarak atu fó fila fali dokumentu sira ne’ebé nia hadau no defende hanesan ninia direitu, hafoin liu tiha fulan 16 nia laran.

Fó fila fali dokumentu no dadus sira ne’e, iha loron uluk fulan ida ne’e nian, ne’ebé supervizona husi Abel Guterres, Embaixadór Timor-Leste nian iha Austrália.

Primeiru-Ministru afirma mós katak, Governu hakarak loke fali Arbitrajen, kona-ba Tratadu Tasi Timor nian, ne’ebé rejista ona iha Tribunál Permanente Arbitrajen nian, iha Haia. Kazu ida ne’e relasiona ho atividade espionajen Austrália nian, ne’ebé hala’o durante negosisaun Tratadu nian kona-ba Ajuste Marítimu Balu iha Tasi Timor nian (DAMMT sigla iha lian portugés).

Iha fulan-setembru tinan 2014, Timor-Leste konkorda ona pedidu Austrália nian atu muda fali kazu rua iha períodu ida fulan neen nian, hodi fó dalan ba dialógu ida ne’ebé significativu liu. Períodu fulan neen nian ne’e sei hakotu iha fulan-marsu.

Timor-Leste nia hakarak, atu diálogu ne’e bele hamosu agenda ida ne’ebé estruturada hodi ko’alia kona-ba lemte fronteira marítima permanente sira nian, ne’ebé mak seidak realizá.

Portavós Governu Timor-Leste nian, Ministru Estadu Agio Pereira fo hatene katak, “Timor-Leste hakarak nafatin sees an husi konfrontu legál sira no, di’ak liu maka konsentra enerjia hotu no rekursu sira iha dezvoltamentu nasionál. Maski nune’e, misaun Governu nian atu defende interese nasionál sira. Timor-Leste oras ne’e daudaun konsentra ninia esforsu sira atuhodi hala’o diálogu ida ne’ebé signikativu iha relasaun ho ninia viziñu, atubele hakotu baliza ida permanente kona-ba fronteira tasi nian, bazeia ba prinsípiu direitu internasionál.”**FIN**



Agio Pereira
+670 7723 0011
agio.pereira@cdm.gov.tl
govtlmedia@gmail.com
www.timor-leste.gov.tl